

Mid-Day Dogri News Bulletin, 21st June 2024

समे – 12:25

<><><><><><>

Yoga Day

मुख्य भरै दे कन्नो-कन्नी दुनिया भरै च अज्ज 10मां अंतराष्ट्रीय योग दिवस मनाया जा'रदा ऐ। प्रधानमंत्री नरेन्द्र मोदी होरें अज्ज बडलै शेर-ए-कश्मीर अंतराष्ट्रीय कनवेंशन सेंटर श्रीनगर च आयोजित कार्यक्रम च हिस्सा लैता। इस मौके प्रधानमंत्री होरें किट्ठे गी संबोधत कीता ते योग अभ्यास कीता। उनें योग राएं शारिरिक, मानसिक ते आध्यात्मिक विकास गी बी उजागर कीता। SKICC च आयोजित योग कार्यक्रम च खरी मती गिनतरी च लोकें हिस्सा लैता। उनें आखेआ जे श्रीनगर च योग कार्यक्रम च ओह योग दी ऊर्जा गी मसूस करी सकदे न। उनें अंतराष्ट्रीय योग दिवस दियां सब्बने गी शुभकामना दित्तियां। योग दिवस पर केई सारे मुख्खें च कार्यक्रम आयोजित कीते जा'रदे न। अंतराष्ट्रीय योग दिवस नै अपने 10 ब'रें दा सफर पूरा कीता ऐ। 2014 च अंतराष्ट्रीय योग दिवस दा प्रस्ताह रखेआ गेआ हा जिसी 177 मुख्खें दा समर्थन हासल होआ जेहड़ा अपने आपा च रिकार्ड ऐ। अदू थमां योग दिवस मनाया जा'रदा ऐ। उपराज्यपाल मनोज सिन्हा केन्द्रीय मंत्री पी.जी.यादव ते होर दुए मन्ने परमन्ने दे लोकें कार्यक्रम च हिस्सा लैता। राष्ट्रीय राजधानी ते मुख्य दे होरने हिस्सें च बी योग दे कार्यक्रम करोआए जा'रदे न। जम्मू दे आर.एस.पुरा सेक्टर आले अंतराष्ट्रीय बन्ने पर बी सीमा सुरक्षा बल दे जुआनें योग कीता। भारतीय सेना नै लेह दे कर्नल सोनम वांगचुक स्टेडियम च योग अभ्यास कीता। स्कूली बच्चे लददाख च पैगांग झील दे कंडे योग कीता।

<><><><><><>

PM Modi Kashmir

प्रधानमंत्री नरेन्द्र मोदी होरें आखेआ ऐ जे जम्मू कश्मीर च विधानसभा दे चुनां बडी तौले करोआए जांगन ते नेड़मे भविक्ख च जम्मू कश्मीर दा राज्य दा दर्जा ब्हाल करने दिए योजनाएं पर कम्म चलै करदा ऐ। लगातार त्रीह बारी मुख्य दा प्रधानमंत्री बनने परैंत कश्मीर घाटी दे अपने पैहले-पैहले दौरे दरान मोदी होरें विधानसभा च प्रतिनिधिएं गी चुनने लेई जम्मू कश्मीर दे लोकें गी सक्षम बनाने दी जरूरतै पर जोर पाया। कल श्रीनगर दे SKICC च लोआए गेदे कार्यक्रम च अपने संबोधन दरान उनें हाल दे लोकसभा चुनाएं च बधी-चढ़ियै शिरकत करने लेई जम्मू कश्मीर दे लोकें दी सराहना कीती।

जम्मू खित्ते च हाल दे आतंकवादी हमलें बारे बोलदे होई उनें आखेआ जे सरकार नेयी भैड़ी कोशशें गी नाकाम बनाने आस्तै वचनबद्ध ऐ। उनें खित्ते दी रमानदारी ते विकास च खलल पाने आले तत्वें दी सख्त निंदेआ कीती। मोदी होरें जम्मू कश्मीर थमां 370 हटाए जाने ते भारती संविधान गी इत्थें लागू कीते जाने दा बी जिक्र कीता। उनें संवैधानिक सिद्धांतें गी बरकरार रखने च नाकाम रौहने ते महिलाएं ते युवाएं गी बा-अखितेयार नेई बनाने लेई पैहलकी सरकारें दी नुक्ताचीनी कीती। उनें अपने धेइयै गी पक्का करदे होई आखेआ जे उंदी सरकार खित्ते च रमानदारी ते खुशहाली गी बढ़ावा देने लेई वचनबद्ध ऐ।



Yoga Day Udhampur

10मां अंतर्राष्ट्रीय योग दिवस “योग फॉर सैल्फ एंड सोसायटी थीम” तैह्त पूरे जोश ते जज्बे कन्ने पूरे उधमपुर च मनाया गेआ। उधमपुर दे सुभाष स्टेडियम आयोग योग कार्यक्रम च खरी मती गिनतरी च लोकें योग कीता। एह्दे च जिले दे अफसरें, सीआरपीएफ सेना दे जुआनें ते बच्चें बी हिस्सा लैता। इस दरान योग दे साढ़े शरीर ते दिमाग पर होने आले सकारात्मक असर बारे बी दस्सेआ गेआं इस मौके पर बोलदे होई उधमपुर दियां डिप्टी कमीशनर सलोनी राय जेड़ियां इस मौके मुख परौहनियां हियां, होरें सब्बने गी योग करने लेई गलाया। उनें आखेआ जे योग असंगी शारीरिक ते जैहनी तौर पर मजबूत बनांदा ऐ।



Chenab Bridge

भारतीय रेलवे नै चना दरेआ पर बनाए गेदे दुनिया दे सब्बने थमां उच्चे रेलवे पुल पर 8 डब्बे आली मैमू रेलगड्डी दी आजमाईश आला ट्रायल रन सफलापूर्वक पूरा कीता। एह्दे कन्ने रियासी थमां बारामुला तगर रेल सेवा शुरू करने लेई बत्त पदरी होई गई ऐ। इक ब्यानै च रेल मंत्रालय नै आखेआ ऐ जे 46 किलोमीटर लम्मे इस ट्रैक पर संगलदान, रामबन ते रियासी बश्कार 40 किलोमीटर फही घेंटे दी रफतार कन्ने रेल दी सफल आजमाईश कीती गई। उधमपुर-श्रीनगर-बारामुला रेल लिंक परियोजना जेह्दे च 48.1 किलोमीटर लम्मा बनिहाल संगलदान आला रस्ता शामिल ऐ, दा उद्घाटन प्रधानमंत्री नरेन्द्र मोदी होरें इस बरे 20 फरवरी कीता हा।



DIG Amarnath

सीआरपीएफ दे डीआईजी विवके भनद्राल होरें इस ब'रे 29 जून थमां शुरु होने आली श्री अमरनाथ यात्रा दी तैआरिएं दा जायजा लैता। एह यात्रा 29 जून गी शुरु होग ते 19 अगस्त गी सम्पन्न होई जाग। मीडिया कर्मिएं कन्ने गल्ल करदे होई उनें आखेआ जे सीआरपीएफ इस ब'रे दी यात्रा गी सफलतापूर्वक सम्पन्न करोआने लेई पूरी चाल्ली तैआर ऐ। उनें आखेआ जे श्रद्धालुएं लेई इस यात्रा गी रमानदारी आला ते सुचारु बनाना चाहने आं।

<><><><><><><>

DDC Doda

डोडा दे जिला विकास कमीशनर हरविंदर सिंह हुंदे निर्देशों पर आर्ट ऑफ लीविंग दी टीम पास्सेआ कल इक विशेष सत्र दा आयोजन कीता गेआ जेहदा मकसद सब-डिवीजन भद्रवाह दे अफसरें-कर्मचारिएं गी दमागी सेहत ते तनाह दे प्रबंधन सरबंधी जरूरी हुनरें कन्नै लैस करना हा। कार्यक्रम दा संचालन भद्रवाह दे अडीशनल डिप्टी कमीशनर सुनील कुमार हुंदी दिक्ख-रिक्ख हेट करोआया गेआ। एहदा मकसद कम्मकाज आली थाहरें पर होने आले तनाह दे प्रबंधन ते दमागी सेहत बरकरार रखने च मदाद आली तकनीकां ते ज्ञान उपलब्ध करोआना हा। इस पैहलकदमी राएं कम्मकाज आली थाहरें पर मता बेहतर महौल जकीनी बनोग।

<><><><><><><>

Hajj Pilgrimage

मक्का च तापमान 100 डिग्री फेरनहाईट दे पार पुज्जने ते बड़ी जबरदस्त गर्मी ते लूह करी साऊदी अरब च इस ब'रे दी हज यात्रा दरान अजें तगर 1 जहार शा मते श्रद्धालु जान मुहाई चुके दे न। इस सलाना यात्रा दरान तकरीबन 10 मुल्खें दे कुल 1 जहार 81 लोकें दी मौत होई गेदी ऐ। मक्का च इस हफते तापमान बड़ा मता होई गेआ हा। केई मुल्खें जियां भारत, मिस्र, मलेशिया, पाकिस्तान, जार्डन, इंडोनेशिया, ईरान, सेनेगल ते ट्यूनीशिया नै हज यात्रा दरान अपने बसनीकें दी मौत दी तस्दीक कीती ऐ।

<><><><><><><>